



Publicaziuns dalla vischnaunca, jamna 11

Lubientschas da baghegiar

L'istanza da baghegiar ha concediu suandontas lubientschas da baghegiar:

Nr. 2015 – 1022.000

Kurt e Doris Anna Notz-Kurmann, Sonneggstrasse 8, 8134 Adliswil; construcziun d'in suttetg cun plaz da seser, parcella 1739, Via Faltscharidas 9, 7180 Disentis/ Mustér.

Nr. 2016 – 1007.000

Pirmin e Helena Lozza-Camathias, Via Sontget 11, 7180 Disentis/Mustér; construcziun d'ina casetta da curtgin, parcella 1006, Via Sontget 11, 7180 Disentis/Mustér.

Nr. 2016 – 1010.000

Thomas Monn, Wachterweg 3, 8057 Turitg; spazzar las casas 93 e 94 ed il clavau 93A, parcellass 787 e 790, Via Veglia 1 e 3, 7180 Disentis/Mustér.

Disentis/Mustér, ils 15 da mars 2016
Uffeci da baghegiar Disentis/Mustér

Administraziun communal

Sur Pastgas ei l'administraziun communal serrada naven da **gievgia, ils 24 da mars 2016 allas 12.00 entochen mardis, ils 29 da mars 2016 allas 9.00.**

Administraziun communal Disentis/Mustér

Cussegl da vischnaunca

Informaziun investur Marcus Weber, revisiun lescha e regulativ davart las taxas canali-saziun/serenera, informaziun priorisaziun e finanziaziun projects comunals

En sia seduta dils 11 da mars 2016 ha il cussegl da vischnaunca sut il tgamun da Livio Zanetti tractau pliras fatschentas.

Primarmein ha igl investur Marcus Weber informau il cussegl da vischnaunca davart ils projects previ a S. Catrina ed a Caischavedra. Igl investur Marcus Weber puntuescha l'impurtonza per novs impuls al turissem a Mustér. Entras la digren da letgs administrai ein las frequenzas dallas Pendicularas Mustér sereducidas marcantamein. Corrispudentamein ein era ils mettels per novas investziuns buca avon maun. Entras il resort Catrina eis ei pusseivel da crear rodund 700 letgs administrai ed aschia dar niev slontsch alla sparta turistica. Muort la procedura da planisaziun ed a vesta alla precedentia sanaziun dil rempar Val Acletta seretarda il project per il resort. Per saver realisar il project sco previu ei era in engaschament finanziel communal vid il rempar Val Acletta indicau. Sper il resort Catrina ei era ina cabina da colligiaziun denter Sedrun ed il Parlet en planisaziun. Alla staziun da muntogna dalla colligiaziun ei previu d'ereger in restaurant. Gest a vesta digl unviern vargau cun pauca neiv ei era il project d'ennevar da gronda impurtonza strategica. Muort recuors dallas organisaziuns digl ambient seretarda quei project marcantamein. Marcus Weber giavischa dils ulteriurs purtaders turistics pli bia slontsch en nossa destinaziun turistica. Sper l'impurtonza dalla stagiun d'unviern duei cunzun la stagiun da stad vegnir promovida. Grazia alla natira intacta ed il territori da skis singular ha nossa vischnaunca optimalas premissas per in saun e persistent svilup. Era il Parc Adula sco cunterpeisa visavi il turissem intensiv duei vegnir realisau. Perquei duei in turissem migeivel vegnir promovius.

Il cussegl da vischnaunca ei vegnius informaus davart la priorisaziun e finanziaziun dils projects comunals dils proxims sis onns. Totalmein ei previu d'investar enteifer quei temps bunamein 24 milliuns francs. Suentar haver risguardau las entradas da rodund 7 milliuns francs restan investziuns nettas da 17 milliuns francs. Las grondas investziuns pertuccan la sanaziun dalla casa da scola, la sanaziun dil Center da sport e cultura, l'illuminaziun publica, vias communalas, la sanaziun dalla canalisaziun e sereneras, il rempar Val Acletta, la meglieraziun funsila e las vias



communalas. Ils instituts bancars locals ein promts da finanziar las investiziuns, quei era en mira alla funcziun da nosa vischnaunca sco center regiunal ed a vesta dils projects turistics previ. Tier mintga singul project vegn la finanziaziun scolarida precedentamein alla decisiun dall'instanza competententa. Il cussegl da vischnaunca vegn informaus en detagl a caschun dalla tractaziun dil plan da finanzas dils 10 da zercladur 2016.

Per la canalisaziun e las sereneras vegn ina finanziaziun speciala applicada. Tenor quei principi ston las expensas dil quen current vegnir finanziadas cun taxas annualas. Dapi 2003 ei quei buca pli il cass. Il menaschi current ha el temps denter 2003 e 2014 caschunau in deficit da biebein 2 milliuns francs. Quei deficit ei vegnius cuvretgs parzialmein cun taxas da colligiaziun. Las taxas da colligiaziun ein primarmein destinadas per cuvrierer las investiziuns ed intenziunadas sco reserva per futuras adattaziuns. La taxa fundamentala duei cuvrierer ils cuosts dil menaschi (p.ex. amortisaziuns, tscheins interns, manteniment usitau) ed a liunga vesta cun reservas creadas ils cuosts per sanaziuns dils indrezs. Cun la taxa da consum duein primarmein ils cuosts da menaschi variabels (p.ex. cuosts en connex cul consum, cuosts da persunal) vegnir finanziaj. Il motiv che la vischnaunca da Mustér sa buca crear reservas ein las bassas taxas (per colligiaziun e diever) en cumparegliaziun cun autras vischnauncas turisticas en Surselva. Cun augmentar las taxas fundamentalas da diever per 50% e la taxa da consum da 50 rp./m³ sin 75 rp./m³ muntass la relaziun denter la taxa fundamentala e quella da consum a 78% tier 22%, quei che corrispunda alla basa legala. Suenter ina fundada ed extendida discussiun approbescha il cussegl da vischnaunca cun 12 encunter 3 vuschs la revisiun d'art 34 al. 2 e digl art. 40 dalla lescha davart igl allontanament e la purificaziun dallas auas cun suttametter quei conclus el senn d'art. 21 lit. b dalla constituziun communal al referendum facultativ. Cul medem resultat vegn la revisiun dil regulativ da taxas tier la lescha davart igl allontanament e la purificaziun dallas auas approbada. Las revisiuns vegnan messas en vigur cugl emprem da schaner 2016.

Muort il temps avanzau vegn la damonda da credit per remplazzar l'illuminaziun publica spustada sin ina proxima seduta.

Suprastonza communal

Lenna da brisch

Damondas per lenna da brisch (**pégn ni fau**) ein da far en scret **entochen ils 11 d' avrel 2016** agl uffeci forestal dalla vischnaunca da Mustér, Simon Cathomen, caum postal 57, 7180 Disentis/Mustér ni per e-mail; uaul@disentis.ch. Per plascher indicar il sortiment giavischau (lenna sort ni lenna fendida /resgiada) ed il quantum. Sin giavisch vegn la lenna era furnida franco a casa.

Uffeci forestal Disentis/Mustér

Referendum facultativ

A caschun da sia seduta dils 11 da mars 2016 ha il cusseglda vischnaunca approbau cun 12 encunter 3 vuschs la revisiun digl art. 34 al. 2 e digl art. 40 dalla lescha davart igl allontanament e la purificaziun dallas auas.

Conform ad art. 21, lit. b dalla constituziun communal ei quella decisiun suttamessas al referendum facultativ. Il messadi tier sura fatschenta ei exponius per investa en casa communal (stanza nr. 10).

Enteifer 20 dis dapi la publicaziun officiala han 80 votants la pussevkladad d'inoltrar enviers sura conclus il referendum e pretender ina votaziun dil pievel.

Suprastonza communal

Project per in archiv cultural

Fotos veglias, cudischs, collecziuns da scartiras, protocols, films e registraziuns sin pindellas. Tut quei ein documents culturals e historics che meretan da vegnir archivai ed elavurai aschia ch'els san era vegnir publicai per exempel sin ina plattafuorma digitala. Il prighel che documents rimnai sur onns e decennis setschentien in mument el rumien ei daus e quei less la cuminonza impedir,



essend ch'ei setracta savens da documents precius e da muntada per la historia. Dacuort ei seformada la Gruppa d'interess per in archiv cultural dalla vischnaunca da Mustér. Sia finamira ei d'endrizzar in archiv cultural e dar far quel era accessibels alla publicitad. Privats ni uniuns ch'ei en possess da documents culturals e historics e che vulan che quels vegnien archivai en in liug central, san surdar quels al spurtegl dall'administraziun communal ni als treis iniziants digl archiv cultural Gion Tenner, Ervin Maissen e Hans Huonder. Entochen ch'ina localitad adattada persuen-ter ei anflada vegnan ils documents deponi egl archiv communal che sesanfla en casa da scola.

Gruppa d'interess archiv cultural Mustér

Radunonza generala dils dretgs d' alp Nalps e Tegia Miez

Ils **18 da mars 2016** allas 20.15 ella uustria Crestas Segnas.

La suprastonza

Acziun da spender saung

L'acziun da spender saung per donaturas e donaturs dallas vischnauncas da Medel e Mustér ha liug gliendisdis, ils 21 da mars 2016 dallas 18.00–20.00 en halla Cons. Nus engraziein grondamein per quei bien survetsch en favur da malsauns e disgraziai e sperein sin ina stedia participaziun.

Cordial beinvegni *Uniun samaritana Mustér*

Uniun da dunnas Mustér

Gruppa da seruschnar/termagliar

La gruppa da seruschnar/termagliar envida tut ils affons entochen treis onns, ensemen cun lur mummas ni era babs e fargliuns, da passentar in bi suentermiezdi da cumpignia. Als affons vegn purschiu in ambient cumadeivel per termagliar ferton che las mummas/ils babs san sediscutar in cun l'auter. Ei vegn purschiu caffè, te ed aua.

Datum: **gliendisdis, ils 21 da mars 2016**

Temps: 14.30–16.00

Liug: Casa da scola Segnas, local Artgin

Per ulteriur sclariment saveis Vus contactar Clarissa Loretz sut tel. 076 516 14 41

Corporaziun d'aua Spina da Vin, Disentis/Mustér

La **radunonza generala dalla Corporaziun d'aua Spina da Vin** ha liug **mardis Pastgas, ils 29 da mars 2016** allas 20.15 el hotel Alpsu, Disentis/Mustér

Tractandas

1. Beinvegni
2. Elecziun da dus dumbravuschs
3. Protocol, approbaziun
4. Rapport dil president
5. Rendaquen, rapport dils revisurs e dar scarica
6. Projects novs
7. Preventiv e program da lavur
8. Elecziuns:
 - a) quater commembers da suprastonza
 - b) dus revisurs da quen
9. Revisiun regulativ da salarisaziun



10. Orientaziuns

11. Varia

Suenter la radunonza vegn offeriu in mudest refrestg. Tuttas commemoras e tuts commembers ein cordialmein envidai e beinvegni.

Per la suprastonza
Il president, Aluis Flepp

Stalkino – Cinema Salaplauna

Film: Of Horses And Men | Von Menschen und Pferden (IS 2013)

Mittwoch, 30. März, 20 Uhr Filmstart, Kollekte

Dorfleben in Island, irgendwo auf dem Land: Im Vergleich zur Surselva leben dort mehr Pferde als Kühe, viel Schnaps wird getrunken, die Kirche ist der Dorftreffpunkt und Spiegeln gilt als wichtigste Freizeitbeschäftigung der Bevölkerung. Ein Spielfilm, der tragisch und amüsant zugleich das menschliche Zusammenleben im Dorf erzählt.
